

# Yohane

## Ɔwulú Nyɔɔsi

<sup>1</sup>Ani yín ání Bulu lalé, mí ɔpasua ɔhande Yohane dé ɔwulú ánfɔ wanlín sísí fúa fú abí. Ntɔdwé mli fée ɔɔkwali amuto. Megyí mí nkule pé tɔdwé mli, táme ɔhagyíɔha ání oyin ɔɔkwali amu é. <sup>2</sup>Tsúfé ɔɔkwali amu bu anuto, ibétsiá anto brégyíbré.

<sup>3</sup>Ani Sí Bulu mua mu Bi Yesu Kristo bogyíi ani buale. Bɔwúun ani nwe, abuha ani iwilwii, ani ahá ámúú anutɔdwé aba ɔɔkwali su ámu.

### Ɔɔkwali Múa Ɔdwe

<sup>4</sup>Ansí lehué gyi mi bréá nowun ání fú abí ámu aku buna ɔɔkwali ɔkpa ámusu, fé alá ani Sí Bulu lébláa ani. <sup>5</sup>Ani yín ɔdwepú, mliha adwe aba. Megyí mbla ɔɔpwe ndewanlín sísí fú. Mbla ámúú anulébi tsú bré ámúú anulótsɔ hógyi amu ni. <sup>6</sup>Ní futɔdwé Bulu á, fégyi mu mblasu. Mbla ání anulébi tsú bréá anulótsɔ hógyi gyí, adwée aba.

<sup>7</sup>Ahá amlépu tsɔtsɔtsɔ baba ɔyi ánfuto. Budeblí bee Yesu Kristo méln fé nyankpusa. Ahá ánfɔ gyí ahá amlépu pú Kristo alupú ámu ni. <sup>8</sup>Mú su mliki wankláán, ménu mli gymagyihe móɔbwe kpaali, féki mlénya mli ikóká fée.

<sup>9</sup>Ɔhagyíɔha ání ɔmedé Kristo atosunáhé amuto, ɔɔtsun mú ɔma yó ɔde tɔ bambá suná á, mua Bulu bumegyí kule. Táme ɔhá ání ɔde Kristo atosunáhé amuto á, mua ani Sí pú Mu Bi ámu fée bogyi kule. <sup>10</sup>Ní ɔku ɔbá mli wá, ɔmedé Kristo atosunáhé anfi suná á, mli máhɔ mu wá mli wóyítɔ, mli mátsulá mu itsiá. <sup>11</sup>Ɔhagyíɔha ání otsúlá mu itsiá latsá mu lakpan ámúú ɔdebwe ámu bwe.

<sup>12</sup>Asón tsɔtsɔtsɔ bu ɪnvá tɛki nébláa mli, táme mmedékléá nówanlín mú sísí mli. Mboún nde ɔkpa kú ání néba mli wá, méni mía mɪnyɔ abétsiá asi, atɔi nya ansigyí wankláán.

<sup>13</sup>Fú pío tsíhé ámú Bulu lalé ámv abí behá fú itsiá.